

***Kibaaroolu, mennu danteeta  
Januwari, Febuwari niŋ Mee karoo kono  
sanji 2006***

*Kibaari kutoolu be santo*

*Moodu Kante 31.3.2006*

**Katolikoolu la ñaatonkoo ye *Afghan* mansakundaa daani**

Katolikoolu la ñaatonkoo, *Pope Benedict XVI*, ye daaniroo ke *Afghanistan* na peresidaŋo *Hamid Karzai* la ko, a ye balafaa yitandi kee doo ye, ò ka a fo meŋ ye *Abdul Rahman*, ò ye meŋ samba kiitiyo to, kaatu ò ko, a bota Musilimeyaa diinoo le to, a dunta Kiristiyaani diinoo kono. Niŋ luwaa ye ate kendiŋo muta, a ñanta faa la le komeŋ sariyaŋo ye a landi ñaameŋ. Bari *Pope* ye a yitandi ko, hadamayaa kamma *Afghan* mansakundaa ñanta balafaa la ñiŋ kewo ye. Aduŋ kafoo jamaa le ye daaniroo ke fo ò si yamfa wo kewo ye.

\* \* \*

Kibaari kutoolu ye a yitandi ko, *Abdul Rahman*, a be saayiŋ Italiya bankoo kaŋ, a ye tankoo soto daameŋ.

*Moodu Kante 30.3.2006*

**Mooroo ye kewo dundi bataa kono**

Aliwu Joobu, Kambiya mansakundaa ye siwiliyaŋo meŋ tuumi ko, a daa be moolu kono, mennu ye feeroo siti nuŋ ka Peresidaŋ Jamme la mansakundaa boyindi Maaci karoo kono, ate diyaamuta televiisonoo to ka a yitandi ko, a la mooroo le ye a dundi a be baataa meŋ kono bii.

Ate Joobu ye a fo ko, moo meŋ mu a la mooroo ti, Cereno Bokali, wo naata a fo a ye ko, ate Aliwu, luŋ be soto la, a be kela peresidaŋo ti. A ko, wo le ye a tinna, waatoo meŋ na Nduuru Caamu ye a fo a ye, itolu soojaaroolu lafiita ka Jamme la mansakundaa boyindi, aduŋ ò be ate le ke la ñaatonkoo ti, a hakiloo taata a la mooroo ye, meŋ fo a ye nuŋ ko, a be ke la bankoo la ñaatonkoo ti.

A ko, ate laata wo mooroo la baake, aduŋ moori doo fanaa ye wo kuu siifaa fo a ye. Wo le ye a saabu, a laata wo kumoolu la, bari a ye a loŋ ne be temboo meŋ to, wo maŋ ke tooŋaa ti aduŋ ò ye a neenee le.

*Moodu Kante 29.3.2006*

**Furewo jeta baa daala**

Moolu mennu be Burufutu saatewo to, wolu le ye furewo tomboŋ ò la baadaa la. Bari moolu jikita ko, a si ke noo, jiyo le ye furewo samba naŋ wo dulaa to. Saatee moo jamaa le benta nuŋ wo dulaa to, bari wolu kono moo maŋ soto, meŋ ye furewo ñiŋ suutee. Furewo niŋ kumaasita ka toli. Wo le ye a saabu, fo a koleyaata ka a suutee.

*Moodu Kante 29.3.2006*

### **Independent kibaari kayitoo soronta foloo**

Kambiya mansakundaa ye *Independent* kibaari kayitoo soronj ne foloo. Wo kuwo keta nuŋ Maaci karoo kono tumoo meŋ na, poliisoolu taata kibaari kayitoo la koridaa to, ì ye dookuulaalu muta. Bari poliisoolu naata doolu bula fo a tuta ñaatonka fula, Madi M.K Siisee aniŋ Musa Seedikani.

Mansakundaa maŋ feŋ fo, muŋ ne ye a tinna ì ye wo moolu muta waraŋ muŋ ne ye a tinna ì ye wolu la kibaari kayitoo soronj. *Independent* kibaari kayitoo, ì niŋ Peresidaŋ Jamme la mansakundaa buka ì jaa dimbaa kilij na, kaatu mansakundaa ye ì tuumi ko, *Independent* le mu oposisonjolu la diyaamulaa ti, bari wolu ye wo kuwo soosoo le.

*Momodu Justice Daabo 25.3.2006*

### **Moo ye moo faa Burufutu**

Noosoolu, meŋ be Burufutu lopitaanoo to, ye ñiŋ yitandi Maaci karoo tili kononto ko, Alaaji Baaji faata le tumoo meŋ na, ì ye a soo turuneewisoo la a kaŋo to.

Kibaaroolu meŋ futata *Mandinka.org* to, wolu ye ñiŋ ne yitandi, tambilaa Alaaji Baaji faata tumoo meŋ na, a niŋ kendiŋo doo, ì ka fo meŋ ye ko Laamini Jaata, ye kannawaalii baa soto. Wo kannawaaliyo kono, Laamini Jaata naata Alaaji soo niŋ turuneewisoo la a kaŋo to ka a faa. Niŋ maasiiboo keta Burufutu la daansibuŋo le to.

*Fadil Ceesay 25.3.2006*

### **Kuudeetaa Boyiriŋo**

Kambiya la kantaribundaa soojari ñaatonkoo aniŋ a kafaŋoo doolu ye kudeetaa sitindi bankoo peresidaŋo Yaayaa Jamme niŋ a la mansa kundaa kamma. Niŋ keta waatoo le la, kabiriŋ peresidaŋo be kumpabooroo la Murutanii bankoo kaŋ Talaata luŋo la, Maaci karoo tili muwaŋ niŋ kilij.

Niŋ soojaroolu, mennu ye ñiŋ kudeetaa sitindi, ì la ñaatonkoo mu Nduru Caamu le ti.

Ate le mu nuŋ Kambiya la soojari kafoo bee la ñaatonkoo ti tankoo la bundaa to. Niŋ temboo la ate faŋo borita le ka duŋ Kaasamaasi. Bari a dooŋoolu, mennu daa be ñiŋ kuwo to, wolu be bulu to le. Aduŋ fanaa Kambiya mansakundaa be feeroolu bee ke kaŋ ne, ì niŋ Senekaali mansakundaa teema, fo niŋ ì buloo laata ñiŋ soojari kuntiyo kaŋ, ì si a dii Kambiya mansakundaa la.

Peresidaŋ Jamme diyaamuta Kambiya Teleebuŋo (*GRTS*) to Arijuma luŋo suutoo la. A ye ñiŋ ne fo ko, mennu daa be ñiŋ kuwo kono aduŋ ì be bulu to bii, balafaa te yitandila ì la. Aduŋ a ko fanaa, a la kanoo ñiŋ bankoo ye be kontinee la le doronj, a niŋ a la dookuwo. A ye yaamaroo fanaa dii kayiroo niŋ tenkuŋo la.



Kibaaroolu mennu safeeta *Point* la kibaari kayitoo to, ye a yitandi le ko, ñiñ ne mu siiña naanijaño ti, kudeetaa ka sitindi Peresidañ Jamme kamma. Foloo keta Nofemba karoo tili 11, sanji 1994. Fulanjaño keta Januwaari karoo tili 27, sanji 1995. Sabanjaño keta Juunu karoo kono sanji 2000 aduñ Sana Saabali le ye a ñaatonkayaa. Sabanjaño keta Juunu karoo sanji 2000, aduñ meñ safeeta jañ, wo le mu naanijaño le ti.

*Fadil Ceesay 25.3.2006*

### **Karambuñ kononto soronta Basee kono**

Karambuñ kononto soronta Basee saatewo kono le tumoo meñ na, karanbunto dindiñolu, mennu taata kaañañ moo tañ seyi fee, ì bee ketuta ì la karanbuñolu kono jee. Ñiñ jaakalikuwo keta Teneñ luño le la aniñ Talaatoo tilibuloo ñiñ lookuño kono. Wo keta karanbunto dindiñolu la alifaalu ye jaakaliku baa le ti, fo a ye a tinna, ì naata balañ ì la didiñolu la taa la karanbuñolu to, kaatu ì mañ a loñ meñ mu a sababoo ti.

Kibaaroolu, mennu safeeta *Point* la kibaari kayitoo to, ye a yitandi le ko, alifaalu ye daaniroo ke fo ñiñ karanbuñolu si soron foloo. Aduñ kibaaroolu ye a yitandi le fanaa ko, ñiñ temboo la ì ye sunkutundiñ tañ niñ luulu le murundi Basee lopitaani baa to, mennu mañ bambañ noo foloo kabiriñ ì la ketoo koolaa.

Ñiñ kuwo kamma la Baseenkoolu be ninsoo faa la ka a bondi sadaa ti.

*Moodu Kante 6.3.2006*

### **Mansakundaa be sene koridaalu loo la**

Yankuba Tuure, Kambiya la minisita meñ marata senoo la bankoo kañ, ye a yitandi ko, a la bundaa ye feeroolu londi le ka sene bundaariñolu loo bankoo kañ taariñ. Tuure ko, niñ wo keta, sene kuwoo be sooneeyaa la bankoo kañ.

Yankuba Tuure ye ñiñ kumoo fo nuñ tumoo meñ na, a be diyaamu kañ politiki beñ baa to Kalaaji saatewo to. A ko, mansakundaa be senelaalu nindi la seneña betoo la, aduñ a ko a la kundaa be ì maakoyi la masimaalu to, meñ be taa foo masimaa tañ luulu, aniñ ì be ì donto la kodoo fanaa la.

*Moodu Kante 3.3.2006*

### **Kambiya la oposisonoolu ye ñaatonkoo tomboñ**

Bankoo la oposison kafoo NADD, ì ye Halifa Salla tomboñ ka a ke paatiyo la ñaatonkoo ti peresidañ karitee fayi naalaa. Aduñ a niñ bankoo la ñaatonkoo Yaayaa Jamme le be ñoo saba la peresidañ siiraño la Okutoba naalaa.

Korosilaalu ko, Halifa Salla la paatiwo mañ peresidañ Jamme dewundi, niñ a ye a tara ko, Useni Daabo niñ a la kafoo moolu ye ì daa bondi oposisonoolu la kafoo, ko kibaarilaa doolu ye a yitandi ñaameñ.

*Moodu Kante 28.2.2006*

### **Siisee kuuraŋo be Moofinduu waliŋ kaŋ**

Duniyaa kibaaroolu ye a yitandi ko, siisee kuuraŋo be wajabi kaŋ Moofinduu bankoolu kaŋ. Kuuraŋo futata daamento foloo, wolu le mu, *Nigeria, Egypt* aniŋ *Niger*, aduŋ Moofinduu ñaatonkoolu ye kiliroo ke le ko, maakoyiroo ñanta soto la ka, bantanbili ñiŋ siisee kuuraŋo ñaato.

Kuuraŋo ka sawuŋ moo la fanaa niŋ ye a tara, ì maarii ka siisewolu maa. Kaatu a keta *Turkey* bankoo kaŋ koomantoo tumoo meŋ na siisee kuuraŋo fintita jee maafaraŋo la. Kuuraŋo ñiŋ janjanta Tubaabu bankoolu to, komeŋ *Sweden, Germany* aniŋ *France*. Londitiyolu ye a fo ko, siisee kuuraŋo be tenten na ka janjaŋ, kaatu kunoolu ka bo dulaa doolu to ka taa dulaa doolu to duniyaa kono.

*Moodu Kante 28.2.2006*

### **Kambiya katolikoolu la kuntiyo ye a la palaasoo seyi le**

*Bishop Cleary*, meŋ mu nuŋ katolikoolu la ñaatonkoo ti bankoo kaŋ, a ye a la palaasoo seyi le. Kibaaroolu ye a yitandi ko, a la sanjoolu siyaa kamma la a ye ì foŋoo. *Robert Patrick*, wo le ye a la palaasoo taa ka ke Kambiya katolikoolu la ñaatonkoo ti.

*Bishop Cleary*, moolu ye a jayi baake le a la dookuwo kamma la bankoo kaŋ. Aduŋ ì ko, a la kawandoolu bee mu kayiroo niŋ ñaatotaa ti, aniŋ ka hadamayaa sabatindi bankoo moolu teema.

*Moodu Kante 21.2.2006*

### **Dimbaa ye moo saba faa**


Dindiŋ fula niŋ musu kilij ne foota ì la niyolu la tumoo meŋ na, dimbaa bota buŋo kono, ì be nuŋ siinoo la daameŋ. Aduŋ wo maasiiboo keta Manjaikundaa nuŋ soomandaa juuna. Wo ye a saabu, fo moolu maŋ be a kuwoo fahaamu la juuna. Moolu mennu maabeeta nuŋ jee ko, biriŋ ì naamootoo wulita ka dimbaa faa wo ye a tara, a semboo barata.

Buŋ kono feŋ jamaa le janita wo dulaa to. Dindiŋolu baamaa, Faatu Kinte ko, ate jaakalita baake, kaatu wo dindiŋolu doron ne be a bulu, aduŋ a keemaa taata Tubaabuduu kari dantaŋ kooma.

*Moodu Kante 20.2.2006*

### **Kambiya ye fansotoo juura**

Febuwari karoo tili taŋ aniŋ seyi ñinaŋ saŋo kono, Kambiya bankoo ye sanji taŋ naani niŋ kilij fansotoo juura Banjunu la bayee baa to. Moo jamaa le maabeeta wolu kono, Jinee Bisawu aniŋ Muritaninkoolu la peresidaŋolu aniŋ keebaa kummaayaariŋolu, mennu ka munta Kambiya bankoo la ñaatonka foloo, *Sir Dawuda KairabaJawara*.



Yaayaa Jamme, meŋ mu bankoo la ñaatonkoo ti saayin, a ye ñaatotaa yitandi a la mansakundaa ye yiriwaa meŋ ke bankoo kaŋ ñin sanji taŋ niŋ kilin wucoo kono. Aada tulunolu fanaa keta aduŋ soojaroolu niŋ karambunto dindinolu fanaa ye maacoo ke le.

*Moodu Kante 19.2.2006*

### **Moroko mansoo naata Kambiya**

Moo, meŋ mu Morokonkoolu la mansa ti, ì ka a fo meŋ ye Mansa Muhammed Wooronjaŋo, wo le futata Kambiya bankoo kaŋ tili saba kumpabooro la. Aduŋ tumoo meŋ na a be bankoo kaŋ a niŋ peresidaŋ Jamme kacaata kuu jamaa la, komeŋ baadinyaa aniŋ cokiñooyaa la ñin banku fuloolu teema.

Moroko, bankoo ye maakoyiri jamaa le dii Kambiya bankoo la komeŋ londoo, safaaroo fannaa la aniŋ Soojaaroolu la fanna la. A la tili saba kumpabooro waatoo la bankoo kaŋ, Mansa Muhammed, ye booroolu aniŋ kuntiŋ keleran jooraŋolu dii Kambiya mansakundaa la. Biriŋ a futata bankoo la kulintii la jiidulaa to, bankoo moolu kafuta peresidaŋ Jamme la ka ñin Mansoo benduŋ benduŋ ñimaa la.

*Moodu Kante 13.2.2006*

### **Looyaa Useeni Daabo bota NADD**

Useeni Daabo, meŋ mu UDP politiki kafoo la ñaatonkoo ti, a ye a yitandi kibaari saferilaalu ye ko, a te ye a daa bondi oposisoŋolu la kafoo to, ì ka a fo meŋ ye NADD. Kambiya bankoo la oposisoŋolu le kafuta nuŋ ñoo la, ka ke pariti kilin ti ka loo Peresidaŋ Jamme fee kariteefayi naalaa.

Daabo ko, niŋ ì ye a je ate ye a daa bondi NADD, lannooyaa le ti jee, a ko aduŋ kafu te taa noo ñaato niŋ a ye a tara, wo moolu maŋ laa ñoo la. A ko, ate de, niŋ a ye a tara kafudinolu maŋ laa ate la, a be a daa bo la jee. A ko, kaatu niŋ moo maŋ laa ate la, a maŋ suula ate niŋ wo maarii ye tara kafu kilin.

Kibaari saferilaalu ye a ñininkaa ko, fo a maŋ ke ñaatonkayaa kuwo le ye a tinna, a ye a daa bondi NADD. "Hanii", Daabo ko, "ñaatonkakuu te jee."

Kabirin oposisoŋolu kafuta ñooma ka loo Peresidaŋ Jamme fee, APRC, moo jamaa ye a fo ko, NADD te taa noo la ñaato. Ì ko, kaatu ì bee be suularin ka ke ñaatonkoo ti aduŋ wo le be a tinna la, kafoo be janjaŋ na, aduŋ bankoo moolu ye wo le je, a keta: "Yiri baa boyita, kunoolu janjanta."

*Moodu Kante 13.2.2006*

### **Naamukanin bundaa ye naamoo meŋ muta Januwari kono**

Kambiya la bundaa, meŋ marata naamukanin la, ì ka a fo menu ye *Customs and Excise, Observer* kibaari kayitoo ye a yitandi ko, wolu ye naamoo meŋ kaniŋ ñinan Januwari karoo doron-doron kono, a taata fo miliyoŋ keme kilin taŋ luulu niŋ luulu (D 1,155,000,000). Ì ko wo saaboo keta ì la ñaatonkoo Kabaa Tambajan na dookuu betoo, a be meŋ ke kaŋ jee.

Moo korosilaalu ye a yitandi ko, ñiñ sanji fula tambilaa wo bundaa ye kodi jamaa le dundi Kambiya mansakundaa ye, aduñ ì ko, wo mu ñaato taa ti bankoo ye. Ì ko, kaatu naamoo meñ joota, a tambita moolu ye, ì ye laa meñ na.

A kummaayaata baake moolu ye ì la naamoolu joo, kaatu wo ka bankoo la sotoo samba ñaato. Aduñ wo ka a tinna, mansakundaa si dookuu jamaa ke noo bankoo kañ. Niñ ì ye a je, Tubaabu bankoolu yiriwaa ta ka tamba Moofinduu bankoolu ti, jee mansakundaa niñ bankudiñolu buka feeyaa naamu jooroo la.

*Moodu Kante 13.2.2006*

### **Yaamaroo diita ñeesiisindilaalu la**

Elimaani Saari, baadeemaalaa baa, a ye a yitandi ko, ñeesiisindilaalu mañ ñaŋ na feñolu, mennu ì ye a loŋ ko, ì mañ beteyaa, ka ì ke ñeesiisindirañolu ti. A ko, wo be a saabu la fo wo feñolu ye tiñaaroo ke ñ na dandañolu la. Saari ye wo dandalaaroo dii nuñ Kunjuuru saatowo to tumoo meñ na, a niñ *Observer* kibaari kayitoo kacaata. A ko, feñ doolu si ke noo ñewolu bala aduñ ì te tariyaa la tiiña la, komeñ koo. A ye bundaa, meñ marata ñeemutoo la bankoo kañ, daani fo ì si ì hakiloolu tu wo kuwo to baake, kaatu a ko, Kambiya bankoo be jikirij ñewolu la ì la domoribetoo la.

*Momodu-“Justice” Daabo 1.2.2006*

### **Kambiya bankoo ñaatonkoo ye kiliroo ke**

Kambiya bankoo ñaatonkoo ye kiliroo ke Kambiya bankoo diñolu bee kañ puru ì si ñina ì la fatanfansoolu la, ì ye laa ñoo kañ puru Moofinduu la kafu baa la beño, meñ be ke la Kambiya, a si ke a ñaama. Yaayaa Jamme ye ñiñ tandii de, ñiñ Moofinduu bee la beño (*AU Summit*) mu banku kuwo le ti. Wo to m̄ bee ñanta laa la ñoo kañ ne puru a bee si taa kuuke.

*Momodu-“Justice” Daabo 1.2.2006*

### **Poliisoolu be kidoo soto la**

Peresidañ Yaayaa Jamme ye ñiñ tandii de, Kambiya poliisoolu, saayij ì bee le be kidoo soto la. Aduñ a ye ñiñ tandii de, poliisoolu be bundaalu soto la le bankoo karoo bee la (*divisional police units*). Wo kamma la Kambiya ñaatonkoo ye kiliroo ke puru moolu bee si laa ñoo kañ ka poliisoolu maakoyi.

*Momodu-“Justice” Daabo 1.2.2006*

### **Yaayaa Jamme ko:**

**“Jatoo mañ ñapi a kañ.”**

Kambiya bankoo ñaatonkoo, Yaayaa Jamme ye kumoolu soosoo le ko: “Jatoo le ñapita a kañ a la Kanilayi daafeñ maradulaa to.” Kumoolu fota le nuñ ko, jatoo le ñapita Peresidañ Jamme kañ. Bari ate faño naata a yitandi kibaari safeerilaalu ye ko, wo mañ ke tooña le ti. A be kendeyaariñ aduñ jatoo mañ ñapi a kañ.

*Momodu "Justice" Daabo 1.2.2006*

## **UN la dookuulaalu naata Kambiya**

Moo, meɗ si taa fo moo keme naani taɗ luulu, duniyaa la denna kafu baa (UN) dookuulaalu, mennu be dookuwo la *Cote d'Ivoire* bankoo kaɗ, naata Kambiya bankoo kaɗ ka bori fitinakuwolu la.

Ɓ be ñiɗ temboo meɗ to faɗ, ñiɗ duniyaa la denna kafoo dookuulaa doolu ye a kumaasi le faɗ ka duɗ Kambiya kabiriɗ Januwari karoo tili muwaɗ niɗ luulu. Kibaaroo meɗ bota bundaa la, meɗ marata bankoo konokono kuuñaalu la, wo ye ñiɗ yitandi, ñiɗ moolu be naa Kambiya le tumoo meɗ na, fitinoo dunta *Cote d'Ivoire* bankoo kaɗ aduɗ wo kono moo doolu ka ñapi UN la dookuulaalu kaɗ.

"UN be juubeeri kuuke la tankoo kuuñaala la *Cote d'Ivoire*, surutu ò la dookuulaa la tankoo", kibaaroolu ye a yitandi.

*Momodu "Justice" Daabo 1.2.2006*

## **Minisita Faal ko:**

### **Kambeɗo ñanta soto la le diinoolu teema**

Minisita meɗ marata diinoo kuuñaala la Kambiya bankoo kaɗ, Samba Faal, a ye ñiɗ fo ko, kambeɗo ñanta soto la le diinoolu teema, baawo diinoo ka kayiroo le sabatindi duniyaa kono.

A ye niɗ kumoo fo nuɗ waatoo meɗ na, duniyaa la diinoo luɗo juuroo be keriiɗ (*World Religion Day*). Meɗ ye ñiɗ juura beɗ baa londi ñinaɗ jaɗ, wo mu *Bahai* diinoo le ti. I ye a kili, Samba Faal ye a yitandi ko, diinoo mu feɗ ne ti, meɗ si buuñaala, kayiroo anii cokiñooyaa sabatindi duniyaa kono.

*Moodu Kante 31.1.2006*

## **Kambiya be soola dadaadulaa soto la**

*Observer* kibaari kayitoo ye a yitandi ko, sambii Kambiya bankoo be soola tabirilaɗ dadaadulaa soto la. Kibaaroo ye a yitandi ko, wo dookuwo be dati la Epireli kari naalaa. Aduɗ *Elena Steger-Kassama*, *Swiss* bankoo diɗ doo le be wo kuwo samba la naɗ bankoo kaɗ.

Soola tabirilaɗ ñiɗ mu ko famfelendaɗo be ñaameɗ, bari a ka tilimaloo le tilindi kaleeroo bala. Wo be a tinna la kaleeroo ye kandi. Ate *Kassama* ye a yitandi ko, wo soola tabirilaɗo beteyaata baake, kaatu a ko, wo be a tinna la yiri boyindoo wuloo kono anii kaasi maloo be talaa la. Kassama ko, wo kuu siifaalu bee ka tiñaaroo saabu ñ na dandaɗolu la. Kibaaroolu ye a yitandi ko, niɗ wo kuwo keta, banku diɗ jamaa le be dookuwo soto la, aduɗ ò be musoolu fanaa karandi la soola kuwo la anii ò ka a dookundi ñaameɗ.

*Moodu Kante 31.1.2006*

## **Bannasali moto kuwo**

Saɗ-wo-saɗ niɗ banna saloo siita, moo jamaa mennu be Kombo tubaabu bankoolu to, ò ka hame ka taa kafu ò la baadiɗolu la santo saatewolu to, ò niɗ ò ye saloo ke ñoo kaɗ. Bari ñinaɗ

moolu ye bataa soto baake, kaatu doolu ye ì laa kaaraasoolu to taariŋ bankoo kaŋ ka motoo ñini. Daraayifoolu fanaa ka paasoo daa jawuyandi le baake saliwaatoo kono, kaatu ì ye a loŋ ne ko, moolu be a joo la, baawo ì lafita taa la saloo la. Mototiyolu buka soŋ na ka taa santo to, kaatu siloolu maŋ beteyaa wo maafano la. Wo koleyaa kiliŋo le ka laa moolu kaŋ, niŋ ì ka bo naŋ saloo la fanaa. Hani Kambiya la kibaarisafeelaa keebaa doo, ì ka a fo meŋ ye Demba Jaawo, a ye ì laa Sooma kaaraasoo to tili jamaa waatoo meŋ na, a ka bo naŋ ì la saatewo to.

*Moodu Kante 31.1.2006*

### **Kambiya diŋolu menu be Congo woosiita Jamme ye**

Kambiya banku diŋolu, menu be siiriŋ Congo bankoo kaŋ, ye peresidaŋ Jamme daani ko, ì be suulariŋ Kambiya mansakundaa ye moo tomboŋ, meŋ be tara la looriŋ bankoo la moolu, menu be jee.

Kalifa Silla, meŋ mu Kambiya diŋolu la kafoo ñaatonkoo ti jee, a ko, bankoo diŋolu menu be sabateriŋ jee, ì buyita le domandiŋ, aduŋ a ko, jee fanaa mu tamba siloo le ti Kambiya diŋ jamaa ye. Silla ko, niŋ mansakundaa ye moo londi jee, wo be beteyaa la baake, kaatu wo maarii be kali mara la banku diŋolu la bataa la jee. A ye peresidaŋ Jamme jayi, a ye a tentu wo la dookuu ñiimaa la bankoo kaŋ. A ko, wo ye a saabu fo Kambiya too feeñita duniyaa tonkoŋ naanoolu bee to.

*Moodu Kante 31.1.2006*

### **Soojaaroolu ye moolu dandalaa**

Kibaaroolu, menu bota naŋ Kambiya la soojaarikundaa to, ye a yitandi ko, itolu soojaaroolu maŋ lafi ka soojaari faanoo je dundiŋ moo la, meŋ maŋ ke soojaari ti. Ì ko, ì ye a kalamuta le ko, moo kuruŋ doolu ka soojaari faanoo le duŋ, ì ka taa kuu kuruŋolu ke dulaalu to taariŋ. Ì ko, wo ye a saabu fo doolu ka a miira ko, soojaaroolu faŋo le ka wo maañaa siifaalu ke.

Bankoo la soojaari bundaa la diyaamulaa, Lefitinaŋ Kano, ye a yitandi ko, niŋ ì ye soojaari faanoo je moo-wo-moo bulu, meŋ maŋ ke soojaaroo ti, ì be wo maari kiitindi la le. Aduŋ a ko, jaloolu menu ka lafi ñiŋ soojaari feŋolu duŋ na, niŋ ì be denkili laa la, wolu si futa noo soojarikundaa to, ì niŋ ì ye a diyaamu.

*Moodu Kante 31.1.2006*

### **Peresidaŋ Jamme ko:**

#### **"Aadoolu ñanta muta la le"**

Kambiya bankoo la ñaatonkoo Yaayaa Jamme, ye a yitandi ko, Moofinduu ñanta kuwolu bee ke la ka a je ko, aadoo maŋ fili moolu la. Peresidaŋo ko, niŋ moo ye Moofinduu la aadoolu koroosi ì be a je la ko, banta la aadoolu lafita ka moofinduu la aadoolu tiñaa. A ko, Moofinduu la beŋ baa, meŋ keta nuŋ Sudani bankoo kaŋ, ñaatonkoolu ye a koroosi le ko, aadoo mu feŋ ne ti, meŋ kummaayaata hadamadiŋyaa kono. Jamme ko,

- Niŋ ñà ñ dandaŋolu juubee, ì be a je la ko, moolu maŋ ke Moofiŋolu ti aduŋ ì maŋ ke Tubaaboolu ti. Wo duŋ mu maasiiboo le ti, kaatu niŋ aadoo maŋ soto, moolu te ì boodulaa loŋ noo la.



Peresidaŋ Jamme ko, moo-wo-moo, niŋ ò maarii wuluuta, ò baamaa ka a fo ò ye ko, aadoo ko 'niŋ ke' waraŋ 'niŋ bula'. Jamme ko, itolu ñaatonkoolu, mennu benta jee, kambenta ko, aadoolu fanaa ñanta karandi la karambuŋolu to.

*Moodu Kante 31.1.2006*

### **Tubaaboolu ye *Gambia Experience* daani**

Kompaniyo, ò ka a fo meŋ ye *Gambia Experience*, aduŋ kulintiilaa kompaniyo le mu, meŋ ka Tubaabu luntanŋolu bondi Ankaliteeri ka ò fee naŋ bankoo kaŋ liifoo la, ò ye ò daani ko, ò nanta ò la kulintiilaa paasoo talaa la le ka bo Ankaliteeri ka naa Kambiya.

Ankaliteeri diŋ fula le ye niŋ daaniroo yitandi tumoo meŋ na, ò niŋ *Point* la kibaari kayitoo kacaata. Ì ye a yitandi ko, Tubaabu luntanŋ jamaa le ka lafi naa la Kambiya liifoo la, bari ò buka a ke noo, kaatu niŋ kompaniyo ka kodoo meŋ niŋinkaa wo kuŋ na, a siyaata baake le. Ì ko, wo ye a saabu fo saayiŋ Ankaliteeri diŋ jamaa buka naa bankoo kaŋ liifoo la. Saayiŋ, ò ko, Ankaliteeri diŋ jamaa ka taa dulaa doolu to daameŋ paasoo daa sooneeyaata.

*Moodu Kante 31.1.2006*

### **Musu sotoo maŋ sooneeyaa Hafikanisitaŋ**

Kibaaroolu ye a yitandi ko, ka musoo futuu Hafikanisitaŋ (*Afganistan*), a maŋ ke kuu feemaa ti niŋ temboo la, kaatu wuluulaalu, dimmusoolu be mennu bulu, ò ka dolaari wuli jamaa le niŋinkaa kewolu bulu, mennu lafita ò diŋolu la. Sunkutu kiliŋ, ò ka meŋ niŋinkaa a kuŋ na, a ka tamba dalasoo miliyoŋ kiliŋo la.

Bari diina ñaatonkoolu aniŋ kafu doolu, mennu marata hadamaŋiŋolu la ñantoolu la, ò ye wo kuwoolu jalayi baake le. Diina ñaatonkoolu ko, wo maaña na niŋ Isilaamoo maŋ taa ñoo la, aduŋ ò ye mansakundaa daani, fo ò si ò daa bula wo kuwo to.

*Momodu—"Justice" Daabo 30.1.2006*

### **Peresidaŋo pareeta ka Eeds kele**

Kambiya bankoo ñaatonkoo Yaayaa Jamme, a ye a yitandi ko, a la mansakundaa pareeta le ka maakoyiroo ke dindiŋolu la kafoo ye, ò ka a fo mennu ye **Fondinkee Eeds Kelelaalu**, ka Eeds jankaroo bayi. Dindiŋolu la niŋ kafoo loota le ka Eeds jankaroo talaa bankoo kaŋ. Peresidaŋo ye niŋ yitandi ko, dindiŋolu la kafoo ka laañooyaa kuuraŋo bayi, wo ye niŋ ne yitandi ko, laañooyaa kuuraŋo be keriiŋ Kambiya bankoo kaŋ.

*Momodu ~"Justice" Daabo 30.1.2006*

### **Kasamaasi niŋ Senekaali la diyaamoo baayita**

Diyaamoo, meŋ ñanta ke la Kasamaasi la rebeli kafoo (*MFDC*) aniŋ Senekaali bankoo teema, a baayita foloo. Diyaamoo niŋ ñanta ke la le tumoo meŋ na, kele baa naata ke rebeli kafoolu teema lookuŋ tambilaa. Bari diyaamoo niŋ naata baayi le tumoo meŋ na, rebeloolu la kuntiyo ye Senekaali mansakundaa kumandi ka a tandi ò la ko, beŋo niŋ te ke noo la, bari a maŋ a fo, muŋ ne ye wo saabu. Bari Aliwu Baaji, rebeli kuntiyo doo ye niŋ fo ko, kayira diyaamoo baayita le, kaatu kafoolu, mennu be *MFDC* kafoo kono, ò maŋ beŋ.

*Momodu ~"Justice" Daabo 30.1.2006*

### **Jaahali baa sotota Latrikundaa Sabiji**

Jaahali baa sotota Latrikunda Sabiji tumoo mennu sanji muwaŋ sunkutoo ye a teerimaa diŋo faa. Mari Teresa Kamfune, ì ko wo le ye Sona Jaata la deenaani kutoo bula kamoo kono ka a faa. M̃ be ñiŋ temboo meŋ to, poliisoolu ye Jaata niŋ Kamfune muta le aduŋ ì be poliisoolu maakoyi kaŋ ne ì la kisikisiroo to.

*Momodu ~"Justice" Daabo 30.1.2006*

### **Keloo wulita Kasamaasi**

Moo, meŋ si taa fo moo keme fula niŋ moo muwaŋ niŋ kononto, wo le naata bori Kambiya bankoo kaŋ tumoo meŋ na kele baa keta Kasamaasi bankoo kaŋ. Keloo ñiŋ keta rebeloolu dammaa le teema.

Kibaaroolu ye ñiŋ tandii de, ñiŋ borilaalu be jiiyaariŋ baadiŋolu le fee Kambiya bankoo kaŋ. Kibaaroolu ye ñiŋ ne tandii de, ñiŋ moolu maŋ paree ka seyɪ, kaatu ì silata le ko, niŋ ì seyita, ì be foo la ì la baluwo la le.